

pihlingiku

ma rərəmanə saliaku, maru a cacihli ama'a tamuucu macahlia
tumahlisusulu. maru a cacihli ina'a, tamuucu tumatuturu hla apasamanganə
ihlaku.

tam langəlangə a amakuna taku'i'iarə, pi aatə utulu ari muangahlə
puaili. piamacu, maci uka'a salia kana'ana ia, tamuucu saliana masəməta.
ucaniika ta'iarana sapara hlipalava siangusipa, micəcəngəhlə, pasamanganə
aucaucani ta'iarana, kutarakakukua ta'iarə mamaini, karəkəhlə a kana'ana
pakiaturu siangusipi a hlicalivana, tumuruturu ihlaku aunini umahlikua
cucu'u, karəkəhləmana kana'ana kiahlahlamu sitahliasusulu a karina,
tumahlisasangarə ihlaku hla ina'ana. macuaku pi takuliacə təkə ia,
tumatamahləngə kari sitahliasasangarə ihlaku.

tamuucu a kana'ana tama'iarə, ta'iarə məməə ia, takacicihliisa
taku'i'iarə, ucaniika marumana maci pasasavasavəu,
miungucu a taluavəəlana ari rumahləu, makahlualavəu a kana'ana usia
pakiaturua hlamasə iniciki umacəka, ahli'aimau apatakuamə'aumana
ihlahlamu. kuhlaisai, amakuna tamuucu macahlia tumahlisusulu, tamuucu
tama'iarə hla masavəu.

inakuna ia, ihlaisa cacihli mahlauau salia, aariaari a kana'ana marapihli
maipuhlipuhli liliunga salia, avavu camai hla hlumahlavu tikuru, rianə
kana'ana kiacicihli taku'i'iarə, kuna kiahlahlamu a kana'ana
takuapulapulatu, rianə tama'iarə takuamia ta'iarana, mataingahlə macalai
ihlaku, macalai ihlaku siaiapa hla pahlumiamia siaiapəna, siatuturuisa
tamuucu tumamacu hla marucakə, kani'i siaricacanina tamuucu hliulavalava
kana'ana, kuhlaisai, pakiapuhlu a kana'ana matumuhlu siaiapa, karəkəhlə
tumatuturu ihlaku macuisa sitahlamiamia, tumua apapapuhla hliaracahliaku.
ma kani'i siangusipakuna rianə pi sitakuamacua, kuhlaisai, tumatuturua
kana'ana ihlaku langəlangə sitakuamia.

takuliacə vahliciisa, kukiahlahlamu misaini alalualunguhla, ucaniika
tuahlə a kana'ana apahluaili tikiku, kuhlaisai, karəkəhləamu arupakakari,
musa pautuhlangi hlipasapukia. kani'ina ia ihlaisa inaku, tam marucakə hla
tam macalai ihlaku.

kani'ina ia saliaku, tam arukavacangə.

(文章大意 僅供參考) ※字數限 200 字

我的家庭

在我家裡，有一個非常幽默的爸爸，有一個關心我、教育我的媽媽，還有一個活潑可愛的我。爸爸的工作很辛苦，每隔三天才回來一次，他認真對待工作，從來不計較小事，常用生活的例子來教育我做
人，也非常幽默。媽媽是家庭主婦，作業和書寫方面都嚴格要求，讓我擴充知識，她是嚴格又關心我的人。這就是我的家，溫馨而和睦的家。